


CELEBRACIÓN EN OS COTOS

22-23 de marzo do 2025

III SEMANA DO TEMPO DA CORESMA



NON MÁIS
VIOLENCIA
DE XÉNERO



Os COTOS COA IGUALDADE VERDADEIRA DAS PERSOAS,
COS POBOS QUE SOFREN INXUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA,
E SEMPRE SEMENTANDO PAZ



1.- ENCONTRO DA COMUNIDADE

(tod@s de pé)

@ monitor/a está na sé

SAÚDO DE BENVIDA

🎵 **nº 3 Unha xuntanza de amor** *estrofa 1*

Celebrante:

Benvidos sexamos todos a esta celebración. Reunímonos para compartir en comunidade a nosa fe no nome do Pai e do Fillo e do Espírito Santo.

Na parábola do evanxeo de hoxe Xesús cóntanos como un home vai buscar figos á súa figueira e non atopa ningún. Por iso manda que a corten, pero o xornaleiro pídelle ao dono que espere outro ano máis.

Nós somos esa figueira, e cada ano, no tempo da coresma, Deus ven buscar os nosos froitos, e ás veces non os atopa. O noso competir para ser máis que os demais e a nosa comodidade de querer vivir a costa dos demais lévanos a non esforzarnos, a deixarnos ir e ao “non se pode facer”.

Deus é paciente, é misericordioso, grande en perdón e agarimo para con todos. El volve cada ano en busca dos nosos froitos de humanidade. Por iso fuxindo das rutinas temos que facer algo máis.

Deixemos atrás as rutinas e deamos o froito que o Pai espera de nós, que os demais esperan de nós, e que a natureza espera de nós.

ACTO PENITENCIAL

Celebrante: *Xesús móstranos un Deus paciente cos nosos erros, un Pai que quere que nós vivamos o perdón e o amor aos nosos irmáns. Por iso agora pómonos nas súas mans de misericordia, e perdoámonos uns a outros. Xuntos rezámoslle:*

Eu confésome pecador diante de Deus omnipotente e tamén diante de vós, irmáns, pois teño pecado moito de pensamento, de palabra, de obra e de omisión; pola miña culpa, pola miña culpa, pola miña grandísima culpa, por iso lle pido á benaventurada Virxe María e a todos os anxos e santos do ceo, e a vós tamén, irmáns, que rogedes por min a Deus, noso Pai.

Celebrante: *Deus Pai ten piedade de nós, dos que teñen un lugar no noso corazón e na nosa vida, de todos os que sofren e non atopan nin respecto, nin comprensión, nin paz. A todos, o Señor, nos concede o perdón e confiamos nos leva á vida eterna. Amén.*

ORACIÓN PROPIA DO DÍA

Celebrante: *Rematamos a primeira parte da celebración presentando no silencio o que rebule no noso interior. Facémolo hoxe doídos co pouco ou nada que vale a vida nas terras de Palestina, a mesma na que viviu Xesús a súa Pascua.*

(Silenzio)

Celebrante:

Deus, Noso Pai,
celebramos un ano máis os días de coresma
coa mirada posta na Pascua do teu Fillo.
Concédenos que as vivenzas destes días
sirvan para facer minguar as sedes de perdón
de tantos homes e mulleres necesitados de xustiza,
cariño e compañía.

Axúdanos a arrincar da nosa fe as rutinas
tecendo a vida na nova oportunidade
que cada día nos das para dar froito.

Pedímoscho por Xesucristo que vive e reina por
sempre eternamente. Amén.

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Celebrante: *San Paulo quere que os de Corinto, coñecendo o que viviron os seus maiores, aprendan o que teñen que facer para agradar a Deus.*

No Evanxeo, coa parábola da figueira, Xesús móstranos un Deus paciente, capaz de esperar a que deixemos de lado as nosas rutinas e nos esforcemos por DAR FROITO. escoitemos o que esta Palabra nos aconsella.

Leccionario I-C pág 66 1 Cor 10 1-6,10-12 **LECTURA**
LECTURA DA CARTA DE SAN PAULO
AOS CORINTIOS

Non quero, irmáns, que ignoredes que os nosos pais estiveron todos baixo a nube; que todos pasaron polo medio do mar; que, na nube e no mar, todos recibiron o bautismo de Moisés; que todos comeron o mesmo alimento espiritual -pois bebían da pedra espiritual que os acompañaba: e esa pedra era Cristo-. Pero, con todo, a maior parte deles non lle agradou a Deus, xa que ficaron estrados polo deserto.

Isto sucedeu coma un exemplo para nós, a fin de que non teñamos desexos do mal, coma eles os tiveron.

Nin murmuredes, coma algúns deles e pereceron vítimas do Exterminador.

Isto sucedeulles a eles coma exemplo, pero escribiuse para o noso escarmento: para nós. ¡De xeito que o que crea estar de pé, teña coidado de non caer!.

Palabra do Señor

🎵 *nº 50* *Na tardiña baixa da vida* **SALMO**

(en pé) *Leccionario I C pág 68* Lc 13, 1-9 **EVANXEO**
PROCLAMACIÓN DO SANTO EVANXEO
SEGUNDO LUCAS

Daquela presentáronse algúns para contarlle a Xesús o caso aquel de cando Pilato mesturara o sangue duns galileos co dos sacrificios que ofrecían.

El respondeulles:

- Coidades que eses galileos eran máis pecadores que os demais, porque acabaron así? Non tal, e asegúrovos que como non vos arrepintades acabades todos igual. Seica pensades que aqueles dezaioito que morreron esmagados pola torre de Siloé eran máis culpables que os outros habitantes de Xerusalén? Non tal, e asegúrovos que, se non vos arrepentides, todos acabaredes igual.

E púxolles esta parábola:

- Un home tiña unha figueira plantada na súa viña; foi ver se tiña froitos e non llos atopou. Díxolle ao xornaleiro: "Xa hai tres anos que veño buscar froito nesta figueira e non llo atopo. Córtaa, para que vai cansar máis a terra?"

El respondeulle:

"Señor, déixaa aínda un ano máis; vou ver se eu lle covo un pouco arredor e lle boto esterco; a ver se así dá froito...; e, onde non, pódela cortar".

Palabra do Señor

(sentad@s)

gardamos uns instantes de silencio para acoller a palabra no corazón





Que nos propomos nesta terceira semana
da Coresma
con “dona coresma”?

Con ela seguimos descubrindo que hai cousas que necesitamos arrincar na nosa vida, porque non todo vale.

Co ela xa temos arrincado o desexo de ter e competir para ser máis que os demais, tamén temos arrincado o noso desexo de vivir cómodos a costa dos outros. Tamén temos cosido o remendo do compartir e o de implicarnos dando unha man.

Hoxe arrincámoslle á nosa coresma esta perna. (Arrincamos a perna da 3ª coresma). É a perna do conformarnos, do rendernos, do “eu non sei, non valo, non podo”.

Porqué esta perna?, porque no evanxeo Xesús puña o exemplo da figueira que un ano e outro non daba froito. A rutina do deixarse ir, do de sempre o mesmo. Acaso isto non nos está pasando na fe?, !canta rutina e cantas rutinas;

Ao arrincar esta perna descubrimos unha maneira nova de vivir (collemos o “remendo” que está no sobre que vai pegado na perna que lle arrincamos á nosa “dona coresma”, colgamos a perna na pinza, e pegamos o remendo na saia da vella). Acabamos de remendar a vida da nosa dona coresma coa actitude de DAR FROITO.



Temos arrincado algo que nos sobra, a tentación de vivir con rutina e cheos de rutinas, e temos cosido un novo remendo, porque mellor irá a vida se a remendamos con DAR FROITO.

(en pé)

PROFESIÓN DA FE

Celebrante Neste encontro parroquial querendo mellorar a vida damos froito compartindo o credo do día de hoxe. Dicimos: **SI CREEMOS**

Monitor/a:

Credes en Deus, Pai e Nai,
que cada día nos dá unha nova oportunidade,
e nos axuda a arrincar o que sobra na nosa vida?
SI CREEMOS

Credes en Xesús, o seu Fillo Benquerido,
que nos convida a DAR FROITO
porque todos podemos, sabemos
e valemos para facer ben?
SI CREEMOS

Credes no Espírito Santo,
que nos alenta para vencer as rutinas,
sendo exemplo de que con esforzo e loita,
podemos remendar a vida refacendo camiños da paz?
SI CREEMOS

Credes na Igrexa,
a comunidade das mulleres e homes
que queremos facer nosa a PASCUA de Xesús,
e por iso dóenos o nada que vale a vida
cando o único no que nos empeñamos
é en deixarnos ir sen dar froito?
SI CREEMOS

ORACIÓN UNIVERSAL

Celebrante: *Movidos pola fe acudimos ao Pai conscientes das nosas desganas e cansazos, e necesitados de dar froito. Digámoslle*

PAI, PÓMONOS NAS TÚAS MANS

Monitor/a:

✓ Pola Igrexa, por cada parroquia, por OS COTOS, por cada cristián, para que vivamos a coresma como tempo de remendar DANDO FROITO. Oremos

✓ Polas xentes e os pobos que o están pasando escandalosamente mal, feridos nunha violencia terrible que nos ofende e que non podemos entender. Oremos

✓ Polas persoas que no día a día dan froitos que melloran a vida, así dannos tamén bo exemplo para nós facelo mellor. Oremos

✓ Polas mulleres, para que nos esforzos e nas loitas pola igualdade, nos sintamos todos implicados. Oremos

✓ Por nós, que nestes días, da man de dona coresma queremos facelo mellor para chegar á Pascua arrincando da vida as rutinas e remendándoa co DAR FROITO. Oremos

Celebrante: *Señor, Ti que sempre nos escoitas, dános unha man para arrincar o que está mal e así remendar para facelo mellor e chegar á Pascua. Pedímoscho por Cristo, noso Señor. Amén*

3.- OS SIGNOS DA COMUNIÓN CON DEUS E COA COMUNIDADE

NOSO PAI

Celebrante: *Imos rezar dicindo: “veña a nós o teu Reino”, pero sabendo que Deus conta coas nosas mans para construílo. O Reino é seu, pero facelo é cousa nosa, somos nós os que temos que dar froitos. Xesús ensínanolo co conta da figueira. Recemos sen rutina, conscientes da paz que necesitamos refacer:*

NOSO PAI ...



SIGNO DA PAZ

Celebrante: *Díxonos San Paulo na carta de hoxe: “o que crea estar de pé teña coidado de non caer”. Nós tropeizamos con demasiadas rutinas, nós tropeizamos co “nada pode cambiar”, “todo dá igual”.*

Non podemos ser o de sempre porque co “sempre foi así” nunca daremos froito, e nós queremos dalo. E damos agora froito compartindo un xesto de paz.

♪ nº 36 Fagamos a paz irmáns

COMUÑÓN

Celebrante: *Participar na celebración de hoxe é vivir fuxindo das rutinas, é implicarse por construír o mundo con todas as mans. É DAR FROITO para unha vida digna e mellor con Xesús á nosa beira e da nosa parte.*

Ditosos nós por facer camiño de coresma e compartir coma comunidade este pan do Señor.

Señor, eu non son merecente de que entres no meu fogar, mais unha palabra túa abonda para me salvar

🎵 *Quen nos vai separar de Ti*

4.- AVISOS E DESPEDIDA

ORACIÓN FINAL

Celebrante:

Señor, noso Pai, dámosche grazas porque ao celebrar cada semana a fe coresmal aliméntanos co pan da vida, que enche a nosa fe, fai medrar a esperanza e enfortece a nosa caridade.

Hoxe que con Xesús damos froito do evanxeo, axúdanos a esperarmos cun corazón sen rutinas a celebración da Pascua, que deus sentido á súa vida e enche as nosas.

Pedímoscho a ti Pai, que vives e reinas por sempre eternamente. Amén.

Con Xesús quixemos arrincar o que non nos deixa camiñar con dignidade. Quixemos deixar xa atrás as rutinas e as desganas.

A nosa celebración ten que ser tamén un remendo para vivir no día a día os pasos da coresma que nos achegan á PASCUA. Por iso cada quen pode levar para a casa o REMENDO de hoxe

DAR FROITO

(Repartimos os remendos para levalos para a casa)

Avísase das misas (ver folla do mes)

*Que teñamos un bo día, unha boa semana,
unha boa coresma,
e o Señor nos bendiga, † nos garde de todo mal
e nos leve ao seu fogar de vida eterna. Amén*

*Querendo facelo así de ben co noso remendo
podémonos ir en paz.*



Na vida arrincamos
rutinas
e remendamos co
DAR FROITO

Facendo da Coresma camiño cara a Pascua con Cristo